

# Segunda carta del apóstol San Pablo a los Corintios

---

## Pablo escribe a la iglesia de Corinto

**1** <sup>1</sup>As Pábloat ba ac ayin carit uch cuihsuro. Ba coríntoin acu ayin cuihsuro. Asan Sir ajc cut Jesucristo chihtá ehcúquibro. Aját carit uchan ba acu ayin Timoteo jor cuihsuro. Timotéoan Jesucristo cutar is acu rabro. Ba Jesucristo chiwa Corinto pueblo cuitar itquin acu ayin cuihsuro. Sir uw Acaya cajc bahnác cuitar itquin acu cat ayin cuihsuro. <sup>2</sup>Sirat Tetát cat Cara Jesucrístoat cat ba sehnác etar aját ba cuitar conro. Ba obir yajcayta acu ba ohbac ítayta acu conro.

## Sufrimientos de Pablo

<sup>3</sup>Uwat Sir tamo síhw̄ataro. Siran ay síhw̄ataro. Is Cara Jesucristo Tet tamo síhw̄ataro. Tetát is racar cue rehquír obir yajc etar ey tamo síhw̄ataro. Sirat cuécuquin tan wan chac etar ey tamo síhw̄ataro. <sup>4</sup>Sirat is cuecu ayti tan wan chácáro. Is cuac becayat tan wan chácáro. Acsar isat cat cahujín cuécuti tan wan chácayta acu Sirat isa eyta chácáro. Sirat is tan wan chaquir eyta isat cahujín cat im eyta tan wan chácayta acu Sirat isan eyta chácáro. <sup>5</sup>Uwat Jesucristo ruhw̄ujác eyta is cat eyta ruhw̄uro. Eyta cuaquir Jesucristo chihtá cuitar is ur icar cue rehti tan wan chácáro. <sup>6</sup>Isan ruhw̄ úc tacat, echí yar yajcaro. Isan cue tacat echí yar yajcaro. Ba cuitar yajquín síhw̄ar, baat Sir chihtá cácata síhw̄ar, isat yar yajcaro. Is cuecuc sicor tan wan jácayat ba cat cue bár tan wan chácayqueyra. Ba cuean tan wan jácayat, ba Sir chihtá wácati rehcaçãoqueyra. <sup>7</sup>Is ruhw̄ úr eyta, ba cat eyta ruhw̄ úc cuar Sir chihtá wácati rehcaçãoqueyra. Isat ba ítitan, éytaro. Sir chihtá ques uwat ba ruhw̄uro. Eyta cuar baat wácati etar Sirat ba cue bár sicor tan wan chácayqueyra. Isan cue rehcaçãoqueyra Sirat is tan wan chaquir eyta, ba cat eyta tan wan chácayqueyra. Isat ba tamo síhw̄at, éytaro.

<sup>8</sup>Rábinu, baat cuayir síhw̄ati acu isat ba quin uch ehcunro. Asia cajc cut is ruhw̄ujác chihtá ehcunro. Ey cajc cut is cuácata yajacro. Isan íjmár chihtá cuitar

sera waajar rehjecro. Is bahnác sácata síhw̄ajacro. <sup>9</sup>Is urá cuít síhw̄atan, uwat is tíw̄ata síhw̄ajacro. Uwat is ruh̄w̄uyat, isat Sir tamo cuít síhw̄an ac waquir chájacro. Sácajaquin sicor yin ayquib tamo cuít síhw̄ayta acu eyta yajacro. Ijmár chihtá cuitari sera waajar síhw̄ayta ac eyta yajacro. <sup>10</sup>Is tíw̄ata cuat Sirat is sújacro. Bucoy cat is bar síwataro. Isat síhw̄at, eyat bucoy cat, bucoy cat is síwayqueyra. <sup>11</sup>Baat is cuitar Sir ojcor conyat, is síwayqueyra. Baat eyta conyat, uw quir binat cat Sirat is sújac ojcor Sir quin “oquéy” wacáyqueyra.

### Por qué no fue Pablo a Corinto

<sup>12</sup>Isat ijmár ojcor uchta waquinro. Is ur istanác cuít síhw̄ar waquinro. Isat uw bahnaquin cat, ba cat cayar yajti ítchacro. Sir ub cahmor urá istanác cuitar yajacro. Ijmár uw chihtá cutar yájtiro. Cuat Sirat is cuitar yajc etar isat eyta yajacro. <sup>13</sup>Isat ba acu ayin cuihsuquey baat ráhcuajar bi cácajar bi cuihsútiro. Baat orac rahcuata bi ba acu cuihsúr ayro. <sup>14</sup>Baat cahují bar cájacro. Eyta cuácayat aját acsar ba quin bahnác echí ehcú cunro. Eyta ehcwayat ba caba rahcuáyqueyra. Baat caba rahcyat, as ojcor ay wacáyqueyra. Jesucristo cajc uch cut wicayat, baat as ojcor ay tew̄ áyqueyra. Aját ba ojcor ay waquir eyta baat cat as ojcor ay wacáyqueyra.

<sup>15</sup>Aját eyta seh̄w̄ar, as raza rabar ba quin tiw̄ raquín séhw̄ajacro. Ba icar bucáy ahní rehcayta acu eyta raquín séhw̄ajacro. <sup>16</sup>As Macedonia cajc cut ba quin tiw̄ raquir cat, sicor bicayat cat ba quin tiw̄ ben séhw̄ajacro. Ba quin tiw̄ bicayat, baat Judea cajc cut ben acu as cuitar yajcata séhw̄ajacro. <sup>17</sup>Aját eyta wic ben séhw̄ajac cuaquir, as ey aw̄at rati tinujacro. As ey aw̄at rati tinui cut uwat as ojcor tew̄ jacro. Uwat waquí, asan ajc bucáy wácuano. Sir tamo síhw̄ati binat yajquir eyta, ajatán eyta yajquíc, wácuano. Aját cuw cutara “ihyú, ihyú,” waquir car “batro, batro” sicor wacaro, wácuano, uwat as ojcor. Eyinat waquí, as cuw bucáy wácuano. Uwat as ojcor eyta wacayat, tew̄yat sinro. <sup>18</sup>Cahujinat eyta tew̄ íc cuar, asra eyta cat batro. Síratra itro. Aját ajc istanác cuar tew̄ro. Cuw bucayra téw̄tiro. <sup>19</sup>Sir wacjá Jesucristoat yajquíc chihtá aját cat, Sílasat cat, Timotéoat cat ehcujacro. “Chihtá eyan éytaro,” tew̄ wáneyra eyan eyro. Chihtá eya wácati binro. <sup>20</sup>Sirat chihtán bitara útara bita wac bahjácara, Jesucristo chihtá cuitar bahnacac eyta rehcaro. Eyta bira ey chihtá cuitar isat cat “Uní tew̄ro,” wacaro. Uwat Sir tamo ay séhw̄ayta acu eta jaw̄ wacaro. <sup>21</sup>Sir imát is cat, ba cat Jesucristo chihtá cuitar wácati acu chácáro. Eyat is cat, ba cat imáy jaquin cájacro. <sup>22</sup>Eyat is ojcor wacaro: “Eyin ajmarayro,” waquir cácaro. Eyta caquir is ur icar ima Ajcan Cámuran Ey chájacro. Sir imát chihtá tehmoti rehquín ey ehcún ac, bahnác wácati yajquín ey ehcún ac eyta chácáro.

<sup>23</sup>Aját Sir ub cahmor ba quin wacaro. Aját uní wátieyra, Sirat as bar cuéwayqueyra. Uch rahcwi. Asan ba quin tiw̄ rajaquir waquí aját ba técuata biro. Baat Sir tayar yajác ques aját ba técuata biro. Eyta chihtara tecua cun bár rehquí, as Corinto pueblo tiw̄ rati rehjecro. <sup>24</sup>Ba quin Sir chihtá ahár síw̄tiro. Baatán yarsa sinay yinjacro. Cuatán ba ahní itin acu ba acsar síw̄inro.

**2** <sup>1</sup>Eyta bira ajmár ur icar séhw̄ajacro. Asa eyin cuécwayra bi cun bár rehquít bitiro, séhw̄ajacro. Aját ba tamo eyta séhw̄ajacro. <sup>2</sup>Aját ba cuécuyeyra asan býinati tan wan chácajatro. Ba cuécuyeyra, as ahní réhcajatro. <sup>3</sup>Eyta cuácayát ajmár biti cuar cárta cuihsúr áyjacro. Aját ba ítyatra ahní rehcata biro. Eyta cuat ba tecuay býeyra, asa ahní réhcajatro. Cue rehcatáro. Aját ba ítitan, asan ba owaran tan wan rehcayat, ba cat as owár tan wan rehcaýqueyra. Eyta rehquít as récaji ey aw̄at ratiro. Ey aw̄at rati cuar carit cuihsúr áyjacro. <sup>4</sup>As ur icar to seh̄w̄a yarjacro. Cueat as urá cuájacro. Ba racar as to ojocro. Eyta cuácayát carit ey cuihsúr ba ac áyjacro. Ba cue jaquin séhw̄ari cuihsútiro. Cuat aját ba sehnacan cuít ehcún acu ey cuihsujacro.

### Perdón para el que había hecho mal

<sup>5</sup>Uwat ur ay bár yajác ques cuétara, cuean as ístirai batro. Eyat as ístirai ruh̄w̄ útiro. Cuat ba bahnaquin cat conu ruh̄w̄ujacro. Aját cuít tecua cun bár etar eyta wacaro. <sup>6</sup>Ba quir binat ur ay bár sinjac ques caba cuécujacro. <sup>7</sup>Eyta cuácayát acsar técuati jaw̄ i. Ur ay bár yajác tamo acsar síhw̄ati jaw̄ i. Cuatán urá ay bár yajaquey jor tan wan chaw̄ i. Eytair báreyra, cueat ey urá bahnác cuácatáro. <sup>8</sup>Eyta cuácayát, aját ba quin wacaro. Ey sicor sehnác jaw̄ i. Baat ey sehnác ehcuwi. <sup>9</sup>Aját carit cuihsujáqueyan uch seh̄w̄ar cuihsujacro. Baatán as chih̄tá bahnác rahcuátatara, as aje caquir yajcátatara, ey istín acu récaji cuihsúr áyjacro. Ba urá wahitín ac eyta cuihsúr áyjacro. <sup>10</sup>Baat biyat tayar yajác tamo acsar síhw̄ati chácayát, aját cat eyat yajác tamo acsar séhw̄ati cháquinro. Eyta cuat ur ay bár yajác tamoan aját séhw̄ati chácayát, ba sehnác rehquít Jesucristo ub cahmor acsar séhw̄ati cháquinro. <sup>11</sup>Sisrám Satanasat is cayar yajti acu ey ria acsar ráhctiro. Isat ítit, Satanasat is cayar yajquín ac ima bow̄ cuitar seh̄w̄a báhnajatro.

### Intranquilidad de Pablo en Troas

<sup>12</sup>Aját Jesucristoat yajác chih̄tá ehcwót racayát Troas pueblo cuít wijacro. Erar wiquír ítitan, uwat ey chih̄tá rahcua racar rehjecro. Eyta cuácayát aját yarsa ehcwata rehjecro. <sup>13</sup>Eyta yarsa ehcwata cuar, as ur icar tan wan réhtiro. As rab Tito erar istiti rehquít, tan wan réhtiro. Eyta cuácayát, Troas pueblo cut bin acsar rajacro. Macedonia cajc cut rajacro. Tito uroy rajacro.

### Victoriosos en Cristo

<sup>14</sup>Isat Sir quin “oquéy,” wacaro. Sirat is cájacro. Ima cacmín jaquin cájacro. Caquir imát yajác chih̄tá ehcún ayro. Cajc bahnác cuitar uw bahnaquin quin ehcún ayro. <sup>15</sup>Etar isat uw quin ehcwayat, Sirat ítitan, Jesucristo chih̄tá cuitar ehcuro. Eyta istír ahní rehcaro. Isat bahnaquin cucajá acat ehcuro. Jesucristoat imáy síujaquin cucajá acat cat, cab oc icar beyata bin cucajá acat cat Sir chih̄tá ehcuro. <sup>16</sup>Cab oc icar beyata éyinat ey chih̄tá ráhcuitan, chih̄tá ey cuitar uwa bahnaquin sácatáro. Cuat cahujinat ráhcuitra, chih̄tá ey cuitar Sir jor yarti ohbac ítataro. Chih̄tá ey caba ehcún acu uw ima urá bow̄ cúwajatro. <sup>17</sup>Uw quir binat

Sir chih̄tá eh̄cúc tehm̄ar ray cácaro. Oya rar eyta, ray caquin sihw̄ar Sir chih̄tá eh̄curo. Cuatán isra Jesucristo urán wan reh̄quíur Sir ub cahmor urá istanác cuitar eh̄curo. Ray racar reh̄quiti eh̄cútiro. Cuat Sirat ayic etar isat eyta eh̄curo.

### El mensaje del nuevo pacto

**3** <sup>1</sup>Ba sihw̄at, aját ajmár ojcor ay waquín acu cuihsúc sihw̄ac óraro. Baat as chih̄tá rahcuayta acu ajmár ojcor ay waquín ac cuihsúc sihw̄ac óraro. Cahujinat imár ojcor ay tew̄íc carit chiír eyta ajatrá ajmár ojcor ay tew̄íc carit éytara chítiro. Baat as tamo ay síhw̄ayta acu carit táyotiuro. Cahujínatara baátara aját eh̄cúc chih̄tá bitáratara istín acu carit chícaro. <sup>2</sup>Cuat asra carit eyta bi táyotiuro. Uw quin as ojcor ay waquíc carit táyotiuro. Uwat as chih̄tá bitáratara it cun reh̄cayat, ba urá bitáratara wahítataro. Baat ur ay yajquíc ey wahítataro. Baat ur ay yajquíc étarwan chih̄tá ay bi sinjac reh̄quíur ur ay yajcaro. <sup>3</sup>Aját ba siw̄yat, baat ey chih̄tá sinjac reh̄quíur ur ay yajcaro. Chih̄tá ey Jesucristo chih̄taró. Chih̄tá eya tinta cuitari cuihsuti cuat Sir ima Ajcan Cámuran Eyatra chájacro. Ac ohná cuitari cuihsuti cuat ey chih̄tá ba ur icar chájacro.

<sup>4</sup>Sir ub cahmar Jesucrístoat isa chih̄tá eh̄cuquin ur icar eyta siw̄in acu urán ajcan w̄ijacro. <sup>5</sup>Isat ijmár urá cuitar cábai éhcwajatro. Cuat Sir imát urá wícayatrún, caba eh̄cwátaro. <sup>6</sup>Eyatan is quin chih̄tá anto eh̄cuti bi eh̄cún acu bow̄ wícaro. Chih̄tá anto eh̄cuti eyan Moisés bachan chih̄tán abir cuitari yajquíc sínajatro. Cuat ur icar wícayat sínayqueyra. Moisés bachan chih̄tán uwat yajquít cat caba batro. Etar tayar yajcaro. Cuat Sir Ajcan Cámuran Eyat uw ur ícitra chih̄tá chácayat, Sir jor ohbac itro.

<sup>7</sup>Récaji bachan chih̄tán Moisés at icar Sinaí cubar icar w̄ijacro. Ac ohná cuitar cuihsúr w̄ijacro. Chih̄tá eya, bach eya caba yájcajar etar táyarat uw cuácaro. Chih̄tá eyat uw cuácata cuaquir, Sirat ey wica rabar Moisés ima aca wan beo béoro. Chih̄tá ey cuihsúr wícayat, Moisés sicor uw quin rajacro. Uw quin wícayat uwat Moisés ima aca itit, rahs churot sir éytaan wan wan beo béoro. Acan bahnác wan beo beo wícayat uwat ey bitách wahítajar reh̄jecro. Tin bic tacat uwat ey aca bitách wahítajatro. <sup>8</sup>Moisés chih̄tá uwa cuécwata eya ayan táhnaqui batro. Cuat Sir Ajcan Cámuran Eyat wic eywan ayan cuitro. Ey tamoan uwat cuít síhw̄ata binro. <sup>9</sup>Moisesat eh̄cujác cuitar uw cuácata cuaquir, chih̄tá ey tamo uwat ay síhw̄ajacro. Etarwan bi chih̄tá cuitar ur ay chácayatan, chih̄tá ey tamo ayan cuít síhw̄ata binro. <sup>10</sup>Récaram ayan cuít reh̄jéc ey, ahra etach batro. Ah uch ey ayan cuitro. Etarwan uwat récaram ey tamo sihw̄at ay óraqui batro. <sup>11</sup>Récaram chih̄tá semar bar bahnata binro. Semar bahnata cuaquir uwat ey tamo ay síhw̄ajacro. Etarwan chih̄tá úchicri téhmojoj eywan ayan cuitro. Chih̄tá báhnajar ey ayan cuitro.

<sup>12</sup>Etarwan isat chih̄tá téhmojoj bi sínjacro. Chih̄tá ey téhmojoj etar Sir ima yajquín wac bah̄jác yajquíc ocoo tasan isan im eyta wácatiuro. Eyta cuácayat isat chih̄tá ey bahnaquin ubot rooti eh̄curo. <sup>13</sup>Récaram Moisesat im acan oya cuit tunjacro. Israélinat im ac sir ey istiti acu tunjacro. Ac sir eya tin biquic istiti acu

ruhjacro. Cuat Moisesat yajquír eyta, ísatra éytaan wan yájtiro. Isat bahnaquin ubot chihotá queni ruhcti ehcuro. <sup>14</sup>Moisés im ac ruhjac eyta, áhajira Israelin urá bow̄ bár eyta rehcaro. Eynat ey chihotá ay istítiro. Moisés bachan chihotá cuihsúr bahjacan éyinat rahcti rehjecro. Ahajira chihotá ey tacayat ráhctiro. Ay istítiro. Cuatán chihotá ey rahcuín acu ey istín acu Jesucristo imát urá bow̄ wícata biro. Cuat Israelin éyinat Jesucristo chihotá cátiro. <sup>15</sup>Eyta cuácayat áhajiran Moisés bach cáritan chihotá cáritan tacayat, israélinat urá cuitar bow̄ yájtiro. Rahcuít cat bi ojcor tew̄ ictar urá bow̄ bétiro. <sup>16</sup>Cuatán uwat Cara chihotá cácatay, urá ji rehcatáro. Chihotá ey ay rahcuátaro. <sup>17</sup>“Cara,” wacáyatra, Sir Ajcan Cámuran Ey ojcor tew̄ro. Bíyinatán Ajcan Cámuran Ey chihotá cácatay, éyinat Moisés bacha yájtítara bitarach batro. <sup>18</sup>Moisés im aca cay tunir eyta ísatra éytara yájtiro. Isat Sir ajcan chihotán ruhcti ehcuro. Isat ey ehcwá rabar is urá Sir ur eyta semar semar umás chácáro. Cara Sir Ajcan Cámuran Eyat is urá eyta chácáro. Is quino ajcan urán wícáro.

**4** <sup>1</sup>As cuayir cuar Sirat as sehnác rehquít, ima chihotá ehcwayta acu as yehn áyjacro. Eyta cuácayat aját cuécuti tan wan ima chihotá ehcuro. <sup>2</sup>Cahujinat yajquír eyta aját éytara yájtiro. Eynat uw cahmor rúhcuarir yajcaro. Uwat éyinat yajquíc ítyeyra, éyina ehurán abáy chácáro. Cuatán aját éytara yájtiro. Aját uw cayar yájtiro. Sir chihotá tehmótiro. Aját ba quin ehcuquey uní ey ehcuro. Aját Sir ub cahmor uw bahnaquin quin ajmár ojcor ay wacáro. Eynat as ur istír “urá ayro,” wacátaro. <sup>3</sup>Cahujinat Sir chihotá isat ehcúqueyan ay ráhcuaajartara, cab oc icar beyata éyinatán ay ráhcuaajatro. <sup>4</sup>Cajc uch cutar Sistrám sirir bin eyat Sir chihotá cati acu eyin urá bow̄ cájacro. Eyta cajac étarwan Jesucristo chihotá ráhcuaajar rehcaro. Jesucristo urá tahnác bi chihotá ehcwayat, éyinat ráhcuaajar rehcaro. Jesucristo eyan Sir quen eyro. <sup>5</sup>Aját ehcwáy yehnic cuar, uwat as tamo síhw̄ayta acui chihotá ehcútiro. Cuat Cara Jesucristo tamo síhw̄ayta acu ehcuro. Asan ba acu cacmán wanro. <sup>6</sup>Récaji checúm baquí chira cuácayat, Sirat “cuanwi,” wajacro. Uwat checúm cuitar ub cuitar ístajar eyta récaji as urá cuitar eyta ístajar rehjecro. Eyta cuácayat Sir im eyat as ur icar bow̄ wíjacro. Cajc cuitar cuanír eyta as ur icar cat bow̄ éytaan wan wíjacro. Aját Jesucristo urá cuitar Siran caran cuít istayta acu urá wíjacro.

### El vivir por la fe

<sup>7</sup>Chihotá Sirat as quin wíjaquey ayan tahnacro. Istiyrá ey owárara cutiro. Eyta cuar asa cuayir cuaquir ey chihotá ehcúquibro. Eyta cuácayat uwat istátaro. Ititan, chihotá ey ajayi batro. Sir ima chihotá ey istátaro. <sup>8</sup>Cajc bisar bisar binat, owár binat as ríoro. Eyta rio cuar as síwajar bini batro. Ajmár ur icar cue cuaquir ey tamo táhnaqui sehwa yártiro. <sup>9</sup>Uwat as ruhw̄uro. Eynat as ruhw̄ú cuar Siran as owatro. Uwat as yauwata ahnuro. Eyta yauwata ahnúc cuar bahnacra cuátiro. <sup>10</sup>Uwat Jesucristo yauwir eyta as bisar bisar bicayat, as sibár cat eyta yauwata ahnuro. Eyta yauwata ahnúc cuar as rooti bicaro. Rooti bicayat, uwat ítitan, Jesucristo sicor yehnjác eyat as síuro. <sup>11</sup>Asa áhajira estají rehcatay uwat as bucoy bucoy yauwata ahnuro. Jesucristo chihotá

ehcúc ques icar as yauwata ahnuro. As ruhw̃ úc tacat, úwatan Jesucrístoat is cuitar waquíc chihtá istayta acu as tan úcaro. <sup>12</sup>Sir chihtá ehcúc ques uwat as yauwata ahnúc cuar, aját eyta ehcúc tehmár baan Sir jor ítayqueyra.

<sup>13</sup>Uchicria Sir carit cuitar wacaro,

Aját chihtá rahcuír uní séhṽaro. Etar ey chihtá bar cájacro. Eyta cajac etar aját ey chihtá uw quin ehcujacro.

Cahmor uwat chihtá caquir ehcujac eyta, aját cat Sir chihtá eyta caquir car ehcuro. <sup>14</sup>Cara Jesucristo chinyat, Sirat ey sicor estají yehn áyjacro. Sir im uyat as chinyat Jesucristo jor yehn áyayqueyra. Eyta yehnár car Sir im ubot ba owár estají ítayqueyra. <sup>15</sup>As ruhw̃ úc cuar, aját ba sehná rehquít rooti ehcuro. Eyta cuácayat Sirat acsar acsar cahujín obir yajcaro. Etar acsar acsar cahujinat Sir quino “oquéy, bah urá ayro,” wacáyqueyra. Eta jaw̃ uw quir binat Sir ojcor wacáyqueyra: “Cara ayan tahnacro,” wacáyqueyra.

<sup>16</sup>Eyta bira asan cuecútiro. Aját Sir ima chihtá wácatiro. As sibará bar cuer bicaro. Eyta cuar Sirat as ur icar riy istiy, riy istiy urán bowān bucoy bucoy cuít wícaro. <sup>17</sup>As ruhw̃ úc cuar Sir chihtá cuitar eyta ruhw̃ úc tamo sehṽa yártiro. Ruhw̃ úc cuaquir in bar etro. Eyta etyat Sirat im owár cara yehn áyayqueyra. Eyta yehnár ey jor bur cut suw cut rehcaýqueyra. Eyta bira ruhṽuquey tamo as sehṽa yártiro. Cuít ruhw̃ úc cuar Sirat as acu yajquíc ayan tahnacro. <sup>18</sup>Eyta cuácayat ub cuitar istata ey tamo aját sehṽa yártiro. Cuat ub cuitara uchta ístajar bi tamora aját cuít séhṽaro. Ub cuit uchta itcháqueyan sicor bār jácayqueyra. Cuat ub cuít ístajar eywan bahná báreyra.

**5** <sup>1</sup>Aját uch itro. Is sibár bahnác yaryat Sirat is ojcan tehmár bin wícaýqueyra. Sibár eyra uchta bini batro. Ajquitro. Eywan sicor ohná báreyra. Eywan yárajár binro. Ojc eyta bin Sir jor cuacúr ítayqueyra. <sup>2</sup>Cuat áhajira cajc uch cuitar yarata bin sibará tas cuar ityat is cuácaro. Eyta cuácayat is cuacúr be cun rehcaro. <sup>3</sup>Is ajc cuicayat ajcan ojc batra réhcajatro. Cuat sibár ehchí bin Sirat wícaýqueyra. <sup>4</sup>Sibará yarata bin tas cuar ita rabar, is cue rehquít conro. Eyta cuara sibár batra rehca cun batro. Cuat sibará ehchí bin rácatro. Eyta ityat sibará uch tehmóy cuitar ehchí bin wícaýat, yárajatro. <sup>5</sup>Sir imát isan eyta tehmón acu waquír chájacro. Sirat isan eyta tehmón chihtá wac bahjaquey imát wácati yajcátaro. Eyat wácati yajcata ey ehcún acu im Ajcan Cámuran Ey is ur icar récaji wícaro.

<sup>6</sup>Etarwan aját chihtá uch yarsa cácataro. Aját ítitan, asan ajmár ojc sibár uch tas cuar ityat, cuacúr Sir owár ítajatro. <sup>7</sup>Eyta cuácayat aját áhajira ub cuitar Sira uchta istiti rehcaro. Cuat ub cuitar istiti cuar ey chihtá caquir yajcaro. <sup>8</sup>Chihtá ey aját ay cácaro. Eyta cuácayat as ajc cuícaýatan ayro. Ajc cuícaýat as Sir jor cuacúr ohbac ítataro. <sup>9</sup>Eyta cuácayat asan sibará im uch cuácayat cat, cuacúr sibár istiy cuácayat cat, aját Sir ahní chácaýta acu ur ayan cuít yajcaro. <sup>10</sup>Itchareht yájcajareht Jesucrístoat is bahnaquin urá wahitáyqueyra. Cajc uch cut bitara yajáctara ey wahitáyqueyra. Eyta wahitír car isat bitara yajáctara rahra cat is acu im eyta yajcáyqueyra. Ur ay yajáctara, sicor ay túnayqueyra. Cuat ur ay bār yajáctara, cuécwayqueyra.

### El mensaje de la paz

<sup>11</sup> Eyta étara isan Sir cahmar roocaró. Sir tec chi cun batro. Eyta cuácayat aját uw quin ajc uní cut seo tew̄ro. Uw quin Sir chihtá cac ay cunro. Sirat aját yajquíc itro. Aját yajquíc ba quin ehcú cunro. <sup>12</sup> Aját bucoy ba quínora ajmár ojcor ay ehcwayat, baat ajmár chihtá rahcuayta acui ehcútiro. Cuat behmarat cahujín quin as ojcor rooti ehcwayta acu aját ba quin récaji ehcuro. Cahujinat as cahmí icar tew̄ro. Tew̄quin eyin urá bucayro. Eyin uw cac cahm ay yajquíc cuar, urá bucayro. Baat uw eyin quin tew̄ayta acu ajmár ojcor récaji ehcuro. Baat eyin quin tew̄yat, eyin ajc sácayta acu ajmár ojcor récaji ehcuro. <sup>13</sup> Cahujinat waquít, asan túrarir wácuano. Asa túrarir rehquíctara Sir tamo seh̄war eyta rehcaro. Cuat as túrarir bártara, ba tamo seh̄war eyta rehcaro. <sup>14</sup> Jesucristoan uw sehnác etar aját uw siw̄ro. Aját ítitan, cuis úbisti eyat bahnaquin cuitar Sir tayar yajác tunin chinjacro. Etarwan Sirat is ítitan, is bahnaquin sácajaquinan wanro. Sácajaquinan wan etar tayar yajác ques acsar cuecwa báreyra. <sup>15</sup> Jesucristo chinír sicor estají yehnjacro. Uwa estají binat imár tamo sihw̄ac etayta acu Jesucristo chinjacro. Cuat éyinat Jesucristo ima tamo sihw̄a rabar ítayta acu uw bahnaquin cutar tunin acu chinjacro.

<sup>16</sup> Eyta bira Sir tamo síhw̄ati binat sihw̄ar eyta, aját cahujín tamo éytara séhw̄atiro. Sir tamo síhw̄ati binat sihw̄ar eyta, aját cat récaji Jesucristo tamo bitara útara eyta ay bár séhw̄ajacro. Cuat ahra éytara séhw̄atiro. <sup>17</sup> Bíyinat Jesucristo chihtá cáctara eyin urán ajquitro. Récaji sihw̄ar éytara síhw̄atiro. Récaji yajquír éytara yajti cuar ahra ur ay yajcaro. <sup>18</sup> Bahnác eyta yájqueyan Sirat Jesucristo chihtá cuitar is owár tenac étatro. Etar uwan Sir ima jor ténayta acu im ojcor ehcwayta acu is yin áyjacro. <sup>19</sup> Isat uch wacátaro. Sir iman Jesucristo chinír cuitar uw bahnaquin owár tenay raújacro. Eyta tenar uwat Sir ima tayar yajác ques cuécuti rehjecro. Etar uwan Sir jor ténayta acu isat Sir im ojcor ehcuro. <sup>20</sup> Eyta bira isan Jesucristo chihtá uw quin ehcún acu yinjacro. Eyta cuácayat Sirat is cuít uw quin ajc uní cuitara tew̄ ayro. Isat ba quin eyta tew̄ro. Sir jor ténawi. Ténatira yajti jaw̄i. <sup>21</sup> Uch síhw̄awi. Jesucristoat táyara yájtiro. Eyta cuar isat tayar yajác ques Sirat Jesucristo chin áyjacro. Isat tayar yajác ques isan sac ayti cuat ey chin áyjacro. Jesucristo chihtá cuitar Sir im ub cahmar tayar bár chácayta acu eyta chin áyjacro.

**6** <sup>1</sup> Isan Sir acu ruoro. Eyta cuácayat ba quin ajc uní cut wacaro. Sirat ba sehnác etar baatán Sira ajcá bár chati jaw̄i. Cuáyitra yajti jaw̄i.

<sup>2</sup> Sir carit cuitar uchta wacaro:

Aját ba obir yajquíc cab cucayat aját bahat coníc rahjacro.

Bah siwic cab cucayat, aját bah cuitar wajacro.

Uch rahewi. Ba obir yajquíc cab cujacro. Ahra ba siwic cab cujacro. Eyta bira ahra Sir ojcor conwi.

<sup>3</sup> Uwat isat waquey wácati acu isat ur ay yajcaro. Isat yajquey ojcor ahsín tew̄ti acu eyta yajcaro. <sup>4</sup> Uwat is tamoan Sir chihtá ehcuquin síhw̄ayta acu isat bahnác ay yajcaro. Is cuaquic tacat, is oya bár tacat, is ruh̄w̄úc tacat, isat Sir chihtá etiti

ehcuro. <sup>5</sup>Uwat is tajquíc tacat, is cárcel icar tuníc tacat, Sir chihtá etiti ehcuro. Ricán to bin is acu bucoy bucoy turay yiníc tacat, etiti ehcuro. Isat canar yajc bálnajar tacat, chey istiy cat, istiy cat wan sar camti tacat, riy istiy, riy istiy yayat cuaquíc tacat im eyta Sir chihtá etiti ehcuro. <sup>6</sup>Uwat isan Siray istín acu isan ur istaná sihwā rabar itro. Isat Sir chihtá ay sinro. Cahujín ac turti itro. Bahnaquin acu ay yajcaro. Uw sehnác chácáro. Isat Sir Ajcan Cámuran Ey chihtá cuitar yajcaro. <sup>7</sup>Isat chihtá uní bi ehcuro. Sirat ima urán ajcan is quin wícaro. Eyta cuácayát uwat ítitan, isat Sir chihtá yajcaro. Ur ay bár binat is cuaquin yajcayát, rahra ur ay bár bin burbar yajquín acu isat íjmár cuitatrun urá ay yajcaro.

<sup>8</sup>Is ojcor ay tewí ic tacat, ay tewí ti tacat, isat im eyta Sir chihtá etiti ehcuro. Is tamo ay sihwāc tacat, ay síhwāti tacat, im eyta etiti ehcuro. Uwat sihwāat, isat uw cayar yajquíc síhwāro. Eyta sihwā cuara, isat uw cáyari yájtiro. <sup>9</sup>Uwat sihwāat, is ititi bin uwro. Eyta cuara isan it binro. Uwat is yauwata ahnúc tacat, isan echí itro. Uwat is buquíc tacat, isan echí tan úcaro. <sup>10</sup>Is cuecu aya racar tacat, isan cue batro. Is cuayin cuaquir Sir chihtá ehcwayat ey rahjaquin cahujín quir binan carin yinjacro. Is oya bár tacat, Sirat is at icar icúr bi bahnác wíjacro.

<sup>11</sup>Rábinu, coríntoinu, aját ba quin uní wacaro. Aját ba sehnacan toro. <sup>12</sup>Ajmaratán ba sehnác etítiro. Cuat ráhrara behmáratra as sehnacuí batro. <sup>13</sup>Eyta cuácayát, aját ba quin wacaro. Tetát ima sasá quin waquír eyta aját ba quin eyta wacaro. Baatán rahra as sehnác chawí. Aját ba sehnacan to eyta baat cat rahra eyta sehnác chawí.

### Somos templo del Dios viviente

<sup>14</sup>Jesucristo chihtá cati bin owár chati jawí. Eyin owár chihtá istanra yajquinra síhwāti jawí. Ay yájquinat ay batra bitách yájcayatro. Uwat ítitan, rahs sir ey checúm owatra bitách chácayatro. <sup>15</sup>Sisráam cat Jesucristo urán wan cat yéhnajatro. Eytaan wan Jesucristo chiwan Jesucristo chiwa bár bin owár urá istaná chácayatro. <sup>16</sup>Sir usar Sir queneý tamo síhwāta binro. Ey sar sirir órojoquey tamo síhwājar binro. Eyta cuácayát Jesucristo chihtá cati bin owár baatán chihtá istanra yajti jawí. Uwa im ubach sar itir eyta, Sir cat ba urá sar eyta itro. Sirat carit cutar wacaro:

Asan uw ey owár ítinro. Eyin tac icar rehquinro. As tamoan éyinat síhwātan, Sitro. Rahra cat aját eyin tamo séhwātan, ajmár uwro.

<sup>17</sup>Sirat wacaro:

Sir chihtá cati bin eyin owár ítiti jawí. Acsar waawi.

Ba ajquír jawí. Restá ji bi catoti jawí.

Eyta cuácayát, aját ba owár ténayqueyra.

<sup>18</sup>Asan ba acu Tet cháquinro.

Rahra cat baan as acu sasá chácayqueyra.

Sirat eyta waquír bahjacro.



**7** <sup>1</sup>Aját ba quin wacaro. Sir imat is acu ay yajquín wac bahjacro. Eyta bira isat bi yajcayat ur ay bár yajquíc sinyat, isat ey yajquíc etátaro. Eyta etír car, Sir ajcá ji etar ur ay yajcátaro.

### El cambio de actitud de los corintios

<sup>2</sup>As sehnác chawĩ. Aját uw acu ur ay bár yájtiro. Uw quin ur ay bár yajc áytiro. Aját uw cayar yájtiro. Eyta cuácayat as sehnác chawĩ. <sup>3</sup>Aját eyta waquíc cuaquir ba cahmí icar tewĩn acui wátiro. Aját cahmor wajaquey bucoy im eyta wacaro. Aját baan sehnacro. As yarata tacat, estají rehcata tacat, im eyta ba sehnacro. Isa rahra rahra tan wan itro. <sup>4</sup>Aját ba tamo sehŵat, yarsa yajcátaro. Eyta rehquít, aját ba ojcor tewã rabar ahní rehcaro. Baat ay yajcayat asan ahní rehcaro. Aját ba tamo sehŵa rabar as cuácata cuar, ahnian cuít itro.

<sup>5</sup>Asa usár Macedonia cajc cut wicayat, as tan chati cuájacro. Bitara útura cuácayat as ohbac ítiro. Uwat as tecuay yinjacro. Etar cat as ur icar ba tamoan to sehŵa yarjacro. Baat Sir chihotá wácajactara, wácaticara, ey tamo sehŵajacro. <sup>6</sup>Eyta cuar Siran uw cuájaquin cuitar wáquibro. Eyta rehquít eyat as quin Tito áyjacro. Eyta ayat as sicor tan wan chájacro. <sup>7</sup>Eta jaw̄ baatán Tito ohbac chácyat, acsar as cat ohbac chájacro. Títoat usár wiquír as quin wajacro. Baan as racar, wajacro. Behmarat ur ay bár yajác ques ohbac rehti cue rehjec, ehcujacro. Baat as tamo to síhŵac, ehcujacro. Eyta ehcewayat asan ahnian cuít rehjecro.

<sup>8</sup>Aját récaji carit ba acu cuihsúr áyjacro. Carit ey ayir asan cue rehjecro. “Uw eyat carit istír cuean cuít rehcata,” sehŵar as cat cue rehjecro. Carit aját ayjac ey istír ba cuécujacro. Cuat ítchareht sicor tan wan rehjecro. Eyta cuácayat as cat cue batro. Cuihswata ey cuihsujacro. <sup>9</sup>Ahra as sicor ahniro. Ba cue rehcaçãora, as cat cuécujacro. Cuat cue rehquír car sicor ur ay yajcayat, asa sicor ahniro. Sirat uwat tayar yajác ques cue rehquín acu urá tehmon acu waquír chájacro. Sirat yajquín wajác ey baatán eyta yajacro. Etarwan aját carit yarsa cuihsujacro. Aját ba ruhŵ útiro. <sup>10</sup>Sirat uw urá tehmon ac tayar yajác ques cue rehquín ac waquír chájacro. Uwa eyta cue rehceyat, eyta tehmoayat, Sirat síwayqueyra. Cuat Sir tamo síhŵati bin cat tayar yajác ques cue rehcata óraro. Eyta cue cuar, Sir tamora síhŵatiro. Sir tamo síhŵati rehceyat síutiro. Síuti éyinra sácayat cab oc icar beyátaro.

<sup>11</sup>Sirat bitara cuecun wájactara, baan im eyta cuécujacro. Uch síhŵawi. Baan Sir tayar yajác ques cue rehquít Sir chihotá wácati yajcaro. Cuáyatra yájtiro. Cuat behmarat Sir chihotá cuitar yajca racar chihotá ehcún yajcaro. Tayar yajquíc etiti etar ba cahujín acu túrjacro. Sir cahmor ayú rehjecro. Etar baan sicor asi jor tihra rácatro. Biyat tayar yájactara baatán ey cab rehti técuajacro. Baan cue rehquít eyta yajacro. Eyta rehquít Sirat ítitan, ba sicor tayar batro. <sup>12</sup>Aját carit ey cuihsujacro. Cuat tayar yajaquey ques aját tecuan acui cuihsútiro. Ruhŵujaquey cuitar waquín acui cuihsútiro. Cuat behmarat Sir ub cahmor asan sehnacan bítatara behmarat ey istayta acu ey cuihsujacro. <sup>13</sup>Baatán as carit istír, sicor urá tehmojocro. Eyta etar as urá ahniro. As ohbac chájacro.

Im éytaan Tito ba quin wicayat, ba bahnáquinat Sir chihtá wácati etar ey ohbac chájacro. Tito ohbac chajac chihtá rahcuír asan ahnian cuít chájacro. <sup>14</sup>Récaji Tito anto ba quin biti cuat, aját ey quin ba ojcor ay wajacra. Ahra Tito erar ba quin cur ítitan, baan éytaro. Aját Tito quin wajacan baan bahnacan éytaro. Eyta cuácayat as ayuí batro. Aját ba quin récaji uní wajacra. Ah cat Tito quin ba ojcor wajác cat eyta uniro. <sup>15</sup>Títoat waquít, ba bahnáquinat ey chihtá yajacra. Ey chihtá yajca rabar Tito ajá ji béjecro. Eyat yajquín wajaquey baat bahnác yajacra. Títoat eyta bucoy sehŵa rabar, ba rácaran cuít rehcaro. <sup>16</sup>Eyta cuácayat aját séhŵatan, baat yarsa yajcaro. As chihtá wácatiro. Eyta sehŵar car asan ahniro.

### Dando generosamente

**8** <sup>1</sup>Aját acsar cuihswa rabar, Macedonia cajc cut itquin ojcor ehcunro. Sir chiwa ojcor ehcunro. Eyinatan Sir ajc cut, camur cut yajaquey aját ba quin ehcunro. <sup>2</sup>Eyin abáy ruhŵ úc tacat, ahnian cuitro. Ahnian cuít rehquít rayan bajcán etiti im eyta wíjacra. Eyin cuayin cuít tacat ray bajcán cuít wíjacra. <sup>3</sup>Aját ba quin eyin ojcor uní wacaro. Eyinat bajcá bita wícata bintara eyta wíjacra. Cuat wícata ey acsar cat cuít wíjacra. <sup>4</sup>Imár chihtá cuitar as quin táyojocro. As quin wajacra: “Isat cat bajcá aya rácatro. Sir uw quin Judea cajc cut bin quin bajcá aya rácatro. ¿Bahat isat wiquey cat beyátaica?” wajacra. <sup>5</sup>Aját éyinat bita quen wícata séhŵajac cuít wíjacra. Eyin urá Sir icar cat is icar cat chajac etar bajcá eyta wíjacra. Sirat eyta wiquin acu waquí chájacra.

<sup>6</sup>Eyta cuácayat aját ba quino Tito ayin séhŵaro. Títoat récaji ba cuitar bajcá secuay yehnjáquinro. Baatán eyta secuay yinjác cuar bar et bahjacra. Eyta cuácayat aját bucoy Tito ba quin ayin séhŵaro, bajcá acsar sécuayta acu. Ba cuitar secua tihr ayin séhŵaro. <sup>7</sup>Baatán ayan bahnác cuít yajcaro. Baatán Sir tamo cuít síhŵaro. Ba ayan cuít tew̄ro. Baat cuít sínjacra. Ba ay yájqueyan cuitro. Baat is sehnacan cuitro. Ba bahnaquin cuitro. Ahra baat Tito cuitar bitara yajcátatara, awan itchácayqueyra. Baat cuít wícatatara itchácayqueyra.

<sup>8</sup>Aját ba ahár ayin acui téw̄tiro. Cuatán baat caba yajcayat, itchácayqueyra. Baat Macedonia uwat yajquí eyta yajcayat, itchácayqueyra. Ititan, baat uwan uní sehnacro. <sup>9</sup>Cara Jesucrístoat yajác tamo cat síhŵawi. Eyat is racar rehquít uch yajacra. Récaji eyan oyin carin cuántiro. Eyta cuar ba cuitar waquín ac cuayan wan waajacra. Baan ey jor sicor carin oyin yinayta acu Jesucristo iman cuayan wan waajacra.

<sup>10</sup>Baat bajcá wicay yinjác ey tamo aját uch séhŵaro. Ba ohbac rehcayta acu ajmarát séhŵaquey bah quin ehcunro. Ba récaji bajcá secuay yinjacra. Récaji wica racar isóc rehquít secuay yinjacra. Eyta secuay yinjác bár istiyó. <sup>11</sup>Eyta cuácayat baat bi yajcáy yinjáctara, ey acsar yajw̄i. Bahnác caba tas wiw̄i. Eyta wica racar cat rehŵi. Behmaray bita tas wícatatara eyta wiw̄i. <sup>12</sup>Uwat ima chihtá cuitara wica rácartara, bita tas wícatatara ey wícatatara yársaro. Acsar im at icar bár eyra wícatatara batro.

<sup>13</sup>Baat tan síhw̄atra, bay icuran biyan bahnác wícata síhw̄aro. Eyta bahnác wícata síhw̄ayat, behmarat bi yáyajar síhw̄ac óraro, baat tan síhw̄at. Cuat aját ba quin behmár icúrtara, bíytara, bahnaqui wic áytiro. Sir uw Judea cajc cut binan behmár owara tas rehcata wic ayin séhw̄aro, ajatá. <sup>14</sup>Ah rícara bay oyan, rayan cuít bin cuácayat, eyin obir yajcayat, riy istiy eyin cat oya chí, ray chí cuácayat, rahra cat ba obir yajcáyqueyra. Eyta yajcayat, owara rehácayqueyra. <sup>15</sup>Sir carit cuitar uchta wacaro: Birá ábjaqueya yarsa yájacro. Cájcara bár rehjecro. Conu ábjaqueyin catum owara yarsa yájacro.

### Tito y sus compañeros

<sup>16</sup>Aját ba tamo seh̄w̄ar eyta, Títoat cat ba tamo eyta séhw̄aro. Tito quino Sirat eyta seh̄w̄ áyjacro. Eyta cuácayat aját Sir quin “oquéy,” wacaro. <sup>17</sup>Aját Tito quin wajacro: “¿Bah coríntoin quin bétayica?” wajacro. Eyta wacayat, eya ahní rehjecro. Eya ima chihtá cuitar cat ba quin be racar rehquitra, ahní rehjecro. Etar wajacro: “Bar bétaro,” wajacro.

<sup>18</sup>Tito ba quin bicayat, aját ey jor rab istiy áyinro. Rab eyan Sir chihtá síw̄quibro. Eyat Sir chihtá ay síw̄ ic etar Jesucristo chiwa bahnáquinat ey ojcor ay tew̄ro. <sup>19</sup>Eyta etar eya Jesucristo chiwa owár binat cájacro. Is owár is cuitar bajcá beyin acu cájacro. Bajcá ey isat Sir tamo síhw̄a rabar Sir uwa Judea cajc cut bin acu béyinro. Isat uw racar rehquít, bajcá ey béyinro. Uwat isat sehnác chihtá istayta acu bajcá ey béyinro. <sup>20-21</sup>Isat baat wijac ey uw quin acsar caba wic cunro. Cahují yahníc chati cuar bahnác caba wic cunro. Etar Sir ub cahmor cat uw ub cahmor cat is owár binat wíquinro. Títoat cat, aját cat, rab eyat cat wíquinro. Is owár binat bécayat, uwat is cahmí icar bitách téw̄ajatro. “Bahnacra wítiro,” bitách wácajatro, uwat is cahm icar.

<sup>22</sup>Títoin owár rab eyin owár rab istiy cat áyinro. Rab bawoy eyat isat ítitan, bahnacan ur ay wácati yajcaro. Bawoy eyat búcoyan, búcoyan im eyta yajacro. Ah cat ba tamo seh̄w̄a rabar acsar ur ay yajcáyqueyra. <sup>23</sup>Tito asi jor buc owár ruóquinro. Eya as urán wan rehquít, ba cuitar yajca rabar cat síw̄ro. Rabin cahujinra imár cajc cut binat, Jesucristo chiwa owár binat caquir áyjacro. Eyinat bitara útura ay yajquíc etar, eyin chihtá cuitar uwat Jesucristo tamo ay síhw̄aro. <sup>24</sup>Eyta bira baatán eyin sehnác chaw̄i. Eyta chácayat éyinat síhw̄ataro: “Corinto uwat is uní sehnacro,” síhw̄ataro. “Pábloat ey chiwa ojcor uní tew̄ jacro,” síhw̄ataro. Baatán eyta yajcayat, Jesucristo chiwa owár binat itchácayqueyra.

### La colecta para los hermanos

**9** <sup>1</sup>Aját Sir uw acu bajcá sécuayta acu ba quin cuihsútiir waquít, baatán im eyta caba wícata óraro. <sup>2</sup>Aját ba ítitan, baat secuan síhw̄ajacan birá cuanjacro. Aját Macedonia uw quin baat síhw̄ac ey ehcujacro. Aját wajacro: “Acaya uwat bar secua rácatro. Secua racar rehjecan bár istiyró,” wajacro. Aját Macedonia uw quin eyta wacayat, éyinat cat bajcá secuan yinjacro. <sup>3</sup>Eyta cuácayat aját

Títóin ba quin ayro. Ba quin as biquic cahmor baat bahnác sécuayta acu ayro. Baat as cahmor bajcá sécuata chihtá aját Macedonia uw quin ehcujacro. Eyta ehcujác etar baat wácati sécuayta acu Tito ayro. Cuat baat as ben cahmor sécuati cuácayat as chihtán cuáyarir waáyqueyra. <sup>4</sup>Asan Macedonia uw owár ba quin béyinro. Ba quin cur itit, is cahmor baatán sécuati cuácayat ba cat as cat áywini chácayqueyra. Isat cuayar tew̄ jaquir waquit̄ eyin cahmar áywini chácayqueyra. <sup>5</sup>Eyta cuácayat aját Títóin ba quin cahmor ayin séhw̄ajacro. Bajcán cuít bi baat wiquin wac bahjacan is cahmor sécuayta acu ayin séhw̄ajacro. Eta jaw̄ is cahmor sécuayat, behmár chihtá cuitar caba wícataro. Cuat éytair báreyra, ba cahujín chihtá cuitar wícyeyra, wi cun bár cuaquir ahár wícata óro.

<sup>6</sup>Behmarat ira riquíc ojcor síhw̄awi. Ira rura cuít ricayat, iran cuít chácayqueyra. Cuat ira rura conu ricayat, ira cat conu chácayqueyra. Ira riquír eyta bajcá wiquey cat im éytaro. Conu wícayat, Sirat cat sicor conu wícyayqueyra. Cuat cuít wícayat Sirat cat cuít wícyayqueyra. <sup>7</sup>Ba istiyát, istiyát bita wiquin síhw̄actara eyta wiw̄ i. Behmár urá cuitar ahní síhw̄ar wiw̄ i. Wi cun bártara, ahatra witi jaw̄ i. Uwat es yajti wícayat, Siran ahniro. Eyta cuácayat uwat ima chihtá cuitar wícata binro. <sup>8</sup>Sirat ba ac icúrtara bitara bahnác wícataro. Eyta wicayat, baan icúr táyoti ítataro. Acsar cat cahujín ac ay yajcátaro. <sup>9</sup>Sir carit cuitar es bár bin ojcor uchta wacaro:

Urá ay binat cuayin istiy quin, istiy quin, bajcá tahw̄uro. Eyta tahw̄uyat birá cuanyat Sirat tan china báreyra, wacaro.



(2 Corintios 9.6)

<sup>10</sup>Sir imát riquín acu rura cat wícaro. Yayín acu cat ira wícaro. Eyta cuácayát baat bajcá wícat, Sirat sicor rura cat, ira cat wícatyqueyra. Sirat ba quin acsar cat cuít wícatyqueyra. Cahujín ac ur ay yajcayta acu wícatyqueyra. <sup>11</sup>Eyta wícat, ba oyin, rayin wáyqueyra. Etar baat bitat bitat es yajti wícatyqueyra. Baatán is at cut uw acu bajcá eyta ayat, uw quir binat Sir quin “oquéy” wacáyqueyra. <sup>12</sup>Baatán eyta wícat, Sir uwa siati réhtiro. Yayí réhtiro. Iran oyan caba jácayqueyra. Cuat acsar uwat ba chihotá cut Sir quin “oquéy” wacáyqueyra. Búcoyan búcoyan eyta wacáyqueyra. <sup>13</sup>Baatán bajcá wícat, éyinat ítitan, baat Sir chihotá uní rahjacro. Sir chihotá cuitar baat eyta yajcaro. Wícat, éyinat wacáyqueyra: “Siran ayro. Sirat coríntoin quin es yajc áytiro,” wacáyqueyra. “Raya, oya is quino cat cahujín quino cat wícaro,” wacáyqueyra. “Síratan uw tac icar ur ay bi chájacro,” wacáyqueyra. <sup>14</sup>Sirat ba at cut eyin ac caba wícat, eyin ba sehnacan cuít chácayqueyra. Ba cuitar Sir ojcor conáyqueyra. <sup>15</sup>Sirat ba ac ayan tahnác bi wíjacro. Ima wacjí wíjacro. Is cuitar tayar tunin acu wíjacro. Wíjaquey tamoan isat bahnác síhwá bahnajatro. Eyta cuácayát, isat Sir quin “oquéy” etiti wacátaro.

### La autoridad de Pablo como apóstol

**10** <sup>1</sup>As Pábloat ba quin ajc uní cuít tew̄ro. Jesucrístoan caran cuít cuaquir uwa cuitra técuatiro. Jesucrístoat yajquír eyta aját ba quin ajc uní cut eyta tew̄inro. Cahujinat as ojcor wacaro: “eya cajc istiy cut etar carit rooti cuihsúr ayro. Eyta cuar usár is owár cuácayatra is ubotra ehurán to chácáro,” wácuano. <sup>2</sup>As ojcor eyta wácuano. Uch cat wácuano: “Sir chihotá cati binat síhw̄ar yajquír eyta Pábloat cat im eyta yajcaro,” wácuano. Bíyinan as ojcor eyta wacáyatan, aját éyinan ay bár tecua cunro. Cuat aját baara eyta tecua cun batro. Eyta bira as tec beti jaw̄i. Uní wacaro. Tec beti jaw̄i. As ojcor éytara tew̄i jaw̄i. <sup>3</sup>Aját eyta séhw̄ari yájtiro. Asan Sir tamo síhw̄ati bin tac icar itro. Eyta cuar éyinat tecuar eyta aját éytara uwa técuatiro. <sup>4</sup>Ajmár urá cuitari técuatiro. Uwat imár urá cuitar imár chihotá cuitar técuaro. Cuatán ajatrá éytara técuatiro. Sirat as urá wijac cuitar técuaro. Sirat eyta wijac ey cuitar técuayát aját urá cuít bin cat burbar yajcaro. <sup>5</sup>Sirat as quin urá wícat, chihotá uní bár bin burbar ajc chiw̄ro. Sir ajca cac ayti bin cat cuayar yajquin cat aját burbar ajc chiw̄ro. Sirat as quin urá wícaty cuáyara chihotá cajac éyindra tehmo ayro. Eyta tehmar Jesucristo chihotá cac ayro. <sup>6</sup>Etar baatán ey chihotá caba cac tihryat, bíyinan ey chihotá cati wacayát ques ay bár técuano.

<sup>7</sup>Cahujinat ba quin icúr bi ehcúctara, baatán uní síhw̄aro. Eyta síhw̄ayat ¿behmár cayar yájcajaqui? Bíyatan im ojcor “asan Jesucristo uwro,” waquíctara, eyta cat eyta waca rabar uch cat séhw̄ataro. As tamo cat “Jesucristo uw,” séhw̄ataro. Eyan Jesucristo uw eyta as catum éytaro. Asan ey owáraro. <sup>8</sup>Aját eyta waca raba ajmár ojcor túrarir tew̄ic óraro. Sirat ba ayin acu as urá wijac chihotá waca rabar túrarir tew̄ic óraro. Cuat baan urán cuít chácayta ácura Sirat urá eyta wíjacro. Ba cuayin chaquin acui wítiro. Eyta cuácayát aját uw cahmar rooti tew̄ro. <sup>9</sup>Carit cuihsuyat ba rooyta acui

batro. <sup>10</sup>Cahujinat waquít: “Pábloat carit cuitar chihtá tahnác bi tew̃ ic cuar, uw ub cahmatra imawan cuáyinro. Carit cuitar ay tew̃ ic cuar, is ubotra cuayir tew̃ro,” wácuano. <sup>11</sup>Eyta wáquinat uch síhw̃ataro. Aját cajc istiy cuitar cuaquir carit cuitar tew̃ ír eyta im eyta tew̃ ay cuwinro. Eyta síhw̃awi.

<sup>12</sup>Ajmár ojcor eyta waquíc cuar, éyinat imár ojcor waquír eyta wátiro. Asan eyin owárai batro. Eyinat imár ojcor ayan bahnaquin cuitar wacaro. Eyta waquíc cuar cuayar tew̃ro. Eyin tan síhw̃at, imár chihtá bahnác caba yajác étarwan imaran cahujín cuít síhw̃aro. Eyin tanra eyta síhw̃aro. Eyin imarat itit, ayan tahnacro. Etar cuayar tew̃ro. <sup>13</sup>Cuat aját ajmár ojcor etach téw̃tiro. Síratan aját icúr yajcayta acu cájactara aját ey ojcor wacaro. Ba siw̃ iquey cat eyan eyro. <sup>14</sup>Aját ajmár ojcor caba tew̃ro. Ajc satra tew̃a báreyra. Aját récaji ba quin Jesucristoat yajác chihtá ehcwáy bítiir waquít, éytara téw̃tiro. Cuat ba quin récaji ehcujacro. <sup>15</sup>Eta jaw̃ cahujinat yajác ojcor “aját ey yajácrora,” wátiro. Sirat eyta waquín ajc waátiro. Cuat aját ba quin Sir tamo umás síhw̃ayta acu ehcunro. Ba Sir tamo umás síhw̃ayat ey acsar aját Sir chihtá umás ehcunro. <sup>16</sup>Ba quin tiw̃ cajc istiy Sir chihtá ehcwáy bétaro. Cahujinat yajc bahjác ójcoran “aját ey yajácrora” wa cun batro.

<sup>17</sup>Sir carit cuitar wacaro:

Býatan im ojcor ay tew̃ cun reh cáyatan, éyatan Sirat ey cuitar yajaquey ojcor tew̃ átaró.

<sup>18</sup>Uwat im ojcor ay téw̃yatan, Sir ub cahmor ay waájatro. Cuat Sir imatran ey ojcor ay téw̃yatra, Sir ima ub cahmar ay waátaró.

### Pablo y los apóstoles falsos

**11** <sup>1</sup>Ajmár ojcor cuáyinat tew̃ ír eyta tew̃ inro. Eyta cuaquir, as ajc ruhw̃uti rahcwi. Ba quin wacaro. As ajquey rahcwi. <sup>2</sup>Sir ajc cut aját ba sicar es yajcaro. Aját ba quin Jesucristo chihtá cac áyjacro. Etar aját ba Jesucristo cac cahmar ay yin ay cunro. Tetát ima wacjá cahbara sera jor yehw̃ ín cahmor ay siw̃ro. Ima ra chihtá wácati acu siw̃ro. Tetát wacjá siw̃ ír eyta Jesucristoat ba beyin cahmor aját ba cat eyta siw̃ cunro. <sup>3</sup>Eyta siw̃ cun cuar, ba urá wácata óraro. Baatán Jesucristo chihtá ur istanác cuitar cajac cuar, sicor waca teta óraro. Récaji cumoroát Eva cayar yajcayat, eyat Sir chihtá cati wácajacro. Cumoroát Eva quin ur ay bár yajc ayir eyta, cahujinat cat ba quino eyta ur ay bár yajc áyata óraro.

<sup>4</sup>Cahujinat ba quin Jesucristo chihtá tehmór ehcwayat baat ey rahcuata óraro. Aját ehcuti bi chihtá ehcwayat rahcuata óraro. Ba ur icar ajc ajquír bi bow̃ ajquír bi wícayat, récaji witi bi wícayat, baatán ey cácata óraro. Cahujinat ba quin chihtá istiy ehcwayat aját ehcuti bi ehcwayat, baatán ey chihtá cácata óraro. Baatán etar síhw̃ati waca teta óraro. Eyta wácatatara aját ey seh̃wa yatro. <sup>5</sup>Aját ajmár tamo seh̃w̃at, cahujín eyin urán as cuitra batro. Eyin tan síhw̃atra, Sirat eyin urán tahnác bi wijac síhw̃aro. Eyinat eyta síhw̃a cuar, eyin urán as etach batro. <sup>6</sup>Aját ricán to bin cac cahmari tew̃ ic sinti cuat, ajmár urá to cuitar tew̃ro. Aját baat ay rahcuayta acu bahnác ehcujacro.

<sup>7</sup>Aját ba quino tayar chiti Sir chihá síw jacro. Baan Sir uw yinayta acu ajmarát cacmát yajquír eyta yajacro. Eyta yájqueyan, ¿baat as tamó ay bár síhwáqui? ¿Ba tanra eyta síhwáqui? <sup>8</sup>Ba quin Sir chihá síw in acu, cajc istiy uwat cajc istiy uwat as quin bajcá wíjacro. Ba síw ic cuar éyinatra as quin bajcá wíjacro. <sup>9</sup>As ba owár ita rabar, as raya bahnjacro. Eyta bahnyat, ba quin icrí buw útiro. Cuat Sir uwa Macedonia cajc cut bin behquír, as quin bajcá wíjacro. Etan ba quínora buwúti rehjecro. Acsar cat buwúti ítinro. <sup>10</sup>Aját Jesucristo ajc cut uní wacaro. Aját ba quin tayar chiti síw jac chihá tew̄ro. Ba cajc cut Acaya cajc cut chihá eyta tew̄yat, uwat “Eytach batro,” bitách wácajatro. Bahnáquinat itro. <sup>11</sup>Aját bitara rehquít tayar chítitara ba quin ehcunro. Aját ba sehnác rehquít, tayar chiti síwro. Síratán eyta itro. Aját ba sehnác batra síhwáti jaw̄i.

<sup>12</sup>Acsar cat tayar chiti síw inro. Cahujín ajc chiw̄ín acu eyta síw inro. Eyinat wacaro: “Pábloat bitara síw íctara isat cat eyta síwro,” wacaro. Eyta jaw̄ cuayar tew̄ti acu acsar cat tayar chiti síw inro. <sup>13</sup>Uw éyinat Sir ajc cut síw ic wac cuar, eyta cat batro. Uw éyinat cayar yajquín acu imár ojcor wacaro: “Jesucrístoat ima chihá ehcwayta acu is caquir yin áyjacro,” wacaro. Eyta waquíc cuar, uní batro. <sup>14</sup>Eyinat tew̄ ic rahcyat, ub yehw̄ti jaw̄i. Uw éyinat yajquír eyta Sisrama Satanásat cat im eyta yajcaro. Satanás cuacúr iman Sir cacmír ahrír cat uw ubot waacaro. <sup>15</sup>Etarwan isat itit, Satanás chiwat cat im eyta yajcátaro. Eyinat Sir ima chihá síw ic waquít eyta cat batro. Urá bucáy cuitar síwquinan éytaro. Cuat cábara tinyat, éyinat eyta yajác ques Sirat bar cuéwayqueyra.

### Sufrimientos de Pablo como apóstol

<sup>16</sup>Aját bucoy wacaro. As tamoan cuaya síhwáti jaw̄i. Cuat as tamoan cuaya síhwáctara, aját cuayat tew̄ ic rahcwi. Ajmár ojcor ay tew̄ ic rahcwi. <sup>17</sup>Ajmár ojcor téw ícan Sir ajc cuti téw tiro. Cuáyinat tew̄ ír eyta tew̄ro. <sup>18</sup>Sir ajc cut tew̄ti cuar, cahujinat imarat yajác ojcor ay tew̄ro. Eyta cuácayat ajmarát yajác ojcor cat ba quin waquinro. <sup>19</sup>Ba tanra behmár urán cuít síhwáro. Baat eyta síhwáro. Eyta síhwá cuaquir, cuayar chihá rahcua rácaran cuít sácáro. <sup>20</sup>Uwat ba cacmín chaquir eyta chácayat cat, uwat ba oyan rayan imáy yehw̄ cácyat cat, ba cayar yajcayat cat, éyinatán ba quin ahár sicayat cat, ba cuáyinan wan chácayat cat, baan ajc saca yajcaro. Eyin acura turti yajcaro. <sup>21</sup>Cuat ajatrá baan eyta ruhw̄uti rehjecro. Ba tan síhwátra, asra cuaya rehquitra éyinat ba ruhw̄ úr eyta ajatrá ruhw̄uti rehjecro. Ba tanra eyta síhwáro.

Aját cuáyinat tew̄ ír eyta tew̄ro. Eyinat bitara etar imár ojcor ay tew̄ íctara as cat éytaro. <sup>22</sup>Imár ojcor ay tew̄ ín ac imaran Hebreo uw wacaro. Cuat as cat eyro. Eyinat imaran israelin uw wacaro. Cuat as cat eyro. Imaran Abraham bomcar wacaro. Cuat as cat éytaro. <sup>23</sup>Eyinat imaran Jesucristo chihá ehcuquin wacaro. Cuat aswan tahnacro. Aját áhajira cuáyinat tew̄ ír eyta tew̄ro. Asan Jesucristo chihá ehcucan eyin tahnacro. Asan cárcel icar eyin tahnác tunjacro. Asan Jesucristo chihá ques eyin tahnác buc yehw̄ jacro. Asan eyin tahnác ruhw̄ujacro. As búcoyan búcoyan yawwata yajacro. <sup>24</sup>Asan judíoinat icar esí

beyar car chistara cuitar bujacro. Beyar icar treinta y nueve bujacro. <sup>25</sup>Asan icar bay caruc cuitar bujacro. Icar istiy as cuit aca ter as yauwata yajacro. Asan bucoy bucoy yacúr cuitar bicayat, icar bay canó bahnác cuájacro. Asan chey istiy cat, riy istiy cat yacúr cuitar ajmár istir rih sobásobat yehw'ír béjacro. <sup>26</sup>Asan búcoyan, búcoyan cajc istiy Jesucristo chihtá ehcwót bijacro. Rihat as cuácata tacat, bésinat ruhw'ata tacat, ajmár uwat técuata tacat, judío bár binat técuata tacat, ey echwót bijacro. Asan pueblo cuitar ruhw'ata tacat, uw bár cuitar ruhw'ata tacat, yacúr cuitar cuácata tacat, Jesús chiwir binat ríota tacat, Sir ima chihtá echwót bijacro. <sup>27</sup>Asan búcoyan, búcoyan canarát abáy cuájacro. Chey wan sarac búcoyan, búcoyan camti cuanjacro. Asan búcoyan, búcoyan yayat cat, cucuát cat cuájacro. Asan ojqur' abir bicayat asan ira bár rehjecro. Asan oya bár rehjecro. Asan riwat cat, séroat cat cuájacro. <sup>28</sup>Asa eyta cuácayat cat cajc istiy Sir uw tamo, cajc istiy Sir uw tamo sehwa yatro. Sir chihtá cajc sicor wácatitara, wácajactara istiti rehquít eyin tamo cuít sehwa yatro. <sup>29</sup>Sir uw cahujinat Sir chihtá caba cati cuácayat, asan cue rehcaro. Sir uwat ay bár yajcayta acu cahujinat cayar becayat, asan ey tamo sehwa yatro.

<sup>30</sup>Aját ajmár ojcor wacátair waquít, asan cuayar rehjec ojcor wacátaro. <sup>31</sup>Sir ub cahmor wacaro. Cara Jesucristo Tet ub cahmor wacaro. Uwat Sir tamo, Tet tamo etiti ay tew' átaro. Ey ub cahmar uní wacaro. <sup>32</sup>Asan Damasco pueblo cuitar ityat, gobernador chiwat pueblo querat cuitar bequít chájacro. Cara reya Aretas ajc cut as caquin acu bequít chájacro. <sup>33</sup>Eyta bequít chaquic cuar, as eyin cahm sera waajacro. Asan pueblo querá rahray wihár chistár cuitar áyjacro. Querata cuacúr bin waar chocha cuitar chaquir chistara cuitar as ic oco áyjacro, gobernador chiwa cahmar.

### Visiones y revelaciones

**12** <sup>1</sup>Ajmár ojcor acsar ehcunro. Ajmár ojcor ehcwayat, cuayar ehcúc óraro. Cuayar cuar Sirat as quin chihtá uchta ehcujác ojcor tew' inro. As cámsiris chinjác ojcor tew' inro. <sup>2</sup>Asan cuacúr abá bawoy cuitar cu bah cujacro. Erar cu bah cujacan bara catorcero. Sibár ji cujáctara sibár bár cujáctara istítiro. Sir imatan itro. <sup>3</sup>Asan cuacúr abá ay bi cuitar cu bah cujacro. Sibár jítara, ajc imátara cujáctara, aját istítiro. Cuat Síratan itro. <sup>4</sup>Erar cucayat, as quin chihtá anto istiti bi ehcujacro. Aját acsar éhcwajar bi as quin ehcujacro. <sup>5</sup>As quin chihtá ey ehcujác rehquít ajmár ojcor ay tew'ata cuar éytara téw'tiro. Cuatán ajmár ojcor tew' íctara, asan urá bár ojcor ehcunro. <sup>6</sup>As cuacúr cu bah cujác ojcor ehcwátair waquít, cuayir téw'ajatro. Uní etar chihtá ey ojcor “cuayar bi ehcúc,” wácajatro. Eyta cuar aját ey ójcori ehcútiro. Ey ojcor ehcuquir waquít uwat as tamo cuít síhw'ataro. Cuatán uwat as tamo eyta síhw'ata bini batro. Aját yajquey aját siw'quey uw imarat istír car uw imarat rahcuír car ey tamo síhw'ata binro. <sup>7</sup>Sirat as quin uchta téw'yatan, ajmarát asan cahujín cuít séhw'ata óraro. Eyta cuácayat ajmarát eyta séhw'ati acu as sibirá yarir rehjecro. Sisramat



as yar jájacro. Yar eyan cachá cuit quejquir yar éytaro. <sup>8</sup>Yar eyan sicor tan chácayta acu aját Sir ojcor conjacro. Icar bay Sir quin eyta chíjacro. <sup>9</sup>Eyta conic cuar, Sirat as quin wajacro: “Asa bah racar rehquít bah yar yajcayta acu aját bah quin urá wícaro. Eyta wícat bah acu cábaro. Biyin chihchír bár rehácayatan, aját eyin cuitar cuít yajcaro,” wajacro, Sirat. Eyta cuácayat, ajmarát chihchír bár ey ojcor ahní tew áyqueyra. As eyta cuácayat Jesucristoat ima ajcan urán as ur icar wícatqueyra.

<sup>10</sup>Eyta cuácayat Jesucristo tamo séhwáyat asa yaric tacat ahní rehácayqueyra. Uwat as cahmí icar ay bár tew íc tacat, Jesucristo chihtá ques icar as ruhw íc tacat, as ira bár tacat, as abáy cuac tacat, Jesucristo chihtá cuitar ahní rehácayqueyra. As chihchír bár etar as urán cuít wícaro.

### Preocupación de Pablo por la iglesia de Corinto

<sup>11</sup>Aját cuáycinat tew ír eyta tew jacro. Behmár oquís eyta tew jacro. Ajmár ojcor tew ti cuar baatwán as ojcor ay tew ata bi yajacro. Sir chihtá ehcúquinir éycinat imár ojcor tew ro. Imaran as cuít wacaro. Eyta waquít cat batro. As cuaya cuar, éycinan as cuitra batro. <sup>12</sup>Uch síhwáwi. Ba ub cahmor aját icúr bár sicar yajacro. Yárqueyin cat tan jájacro. Uw urá sar bin cat cuicá te sijacro. Cahujinat as ahnú cuar, aját wácati icúr bi yajacro. Baatán eyta itchacro. Eyta ístír asan Jesucristo chihtá ehcuquib yehnjác chihtá ehcwata bi yajacro. <sup>13</sup>Uch cat síhwáwi. Aját cajc istiy Sir uw acu, cajc istiy Sir uw acu ay yajquir eyta ba acu cat eyta yajacro. Eyta yajquíc cuar aját ba quínora tayar chiti yajacro. Tayar chiti síw jacro. Tayar chiti siw yat ¿ay bár síhwáqui? Aját tayar chiti síw jac ójcotra síhwáti jaw i. Síhwáti cuar baatán as ajcá chi béowi.

<sup>14</sup>Ahra ba quin icar bawoy ben rehcaro. Ba quin bicayat raya chítiro. Ba quin buwá rácarí bitiro. Cuat ba sehnác reht benro. Uch síhwáwi: Sasá conu binat oyan, rayan imár tet acu secuan acui batro. Cuat tet imayra ima sasá acu binro. <sup>15</sup>Eta jaw, ba ajmár sasán wan etar, aját ba siw in ac ajmár ray séhwáti ahuwinro. Eyta cat ajmár cuácata cuar aját ba umás siw in acu bitara útura cuít yajcaro. Asa ba sehnacan cuít cuaquir ráhrara behmatra as sehnacan etach batro. ¿Bitara rehquítqui? <sup>16</sup>Aját ba ohnor buw útan cahujinat itro. Eyta it cuar éycinat as ojcor cayar yajquib wácuano: “Eyat cayar yajquir car is ohnor síwataro,” wácuano, as ojcor. <sup>17</sup>Etar aját ba quin táyoro. ¿Aját uw ba quin ayir cat ba cayar yajcyi? ¿Ba tanra eyta síhwáqui? <sup>18</sup>Tito aját ba quin ayir cujacro. Tito jor rab istiy cat áyjacro. ¿Títoinat ba cayar yajác síhwáqui? ¿Ba tanra eyta síhwáqui? Títoat éytara yájtiro. Aját cat Títoat cat, urá owara yajcaro. Títoat aját yajquir eyta yajcaro. Eyta chihtara, as ajcá ji bétira yajti jaw i.

<sup>19</sup>Aját Sir ubot eyta tew ro. Jesucristo ajc cutara tew ro. Aját ajmár ojcor tew ín acui eyta téw tiro. Cuat ba sehnác rehquít eyta tew ro. Baat Sir chihtá wácati cácatya acu eyta tew ro. <sup>20</sup>Eyta téw tieyra ba rahra rahra ruhw ata óraro. Eyta ruhw uyat aját ba quin cur ítitan, baat ur ay bár yajcata óraro. Baat rahra rahra técuata óraro. Uw sícara es yajcata óraro. Turic cat turata óraro.

Ba ajquír wahw̃ úr técuata óraro. Rahr ojcor, raha ojcor ahsín tew̃ata óraro. Raha raha cahm icar tew̃ata óraro. Eyta ruhw̃ata cuácayat aját téw̃tieyra ay batro. Baat ítitan, asan turay cuwata óraro. <sup>21</sup>Aját récaji eyta téw̃tieyra, baat yajác ques asan Sir ubot ay wíniro. Eyta cuácayat quir bin racar asan cue rehcata óraro. Récaji ba cahujinat ay bár yajacan sicor etiti ques as cue rehcata óraro. Eyinat síhw̃ati isár yajác ques as cue rehcata óraro.

### Advertencias y saludos finales

**13** <sup>1</sup>Ahra asa icar bawoy ba quin benro. As erar cucayat, cahujín cahm icar tew̃ átatar, cuisa bucáy bínatar, bay bínatar ey itchaquey as cac cahmar tew̃ átatar. <sup>2</sup>Bíyinatán cahmor ay bár yajáctara éyinat eyta yajquíc etayta acu aját récaji wajacro: “Etítitara, aját técuano,” wajacro. Cahujinat cat eyta yajti acu wajacro. As ba quin bucoy bir car eyta yajquey et ayin acu wajacro. Récaji wajác eyta ah carit uy cutar cat im eyta cuihsuro. Cajc istiy cuar ima eyta cuihsuro. Uch waquín acu cuihsuro: “Ba quin cucayat, ay bár yájquinat etítitara, bachuti técuano,” waquín acu cuihsuro. <sup>3</sup>Baatán wacaro: “¿Pábloat Jesucristo im ajc cut uní tew̃ íctara? Jesucristo ajc cut tew̃ quir waquít, eyat icúr bár sicar bin icúr bi yajcátaro,” wácuano. Baatán eyta wácuano. Eyta cuar uch síhw̃awi: Jesucrístoat ba acu urá bár binat yajquír éytara yájtiro. Cuat ba tac icar ima camur cuitar bitara útara ay yajc áyjacro. <sup>4</sup>Ajc bár bin, urá bár bin yawwir eyta Jesucristo cat caruc ojcor quejquír yaujacro. Eyta cuar yahncút Jesucristo Sir ima ajc cuitar urá cuitar sicor estají yehnjacro. Jesucristo récaji urá bár binan wan rehquír eyta as cat eyta rehcaro. Eyta cuar yahncút ba acu ay yajquín acu asan Sir ima ajcan urán chi rehcatáro. Asan eyta etar baat ay bár yajc etítieyra, aját ey urá cuitar ba bachuti técuano.

<sup>5</sup>Behmarat Sir chihtá cájaquey wácajactara, wácatitara istín acu behmár tamo síhw̃awi. Ay yajáctara, ay yájtitar ey tamo síhw̃awi. Wácati étarwan, ay yajquíc étarwan Jesucristo urá ba tan satro. Eta jaw̃ baatán eyta istátaro. Cuatán ay yájtitar, eyra ba tan satra batro. <sup>6</sup>Behmár tamo seh̃wa rabar, istátaro. Aját ba cuayar síw̃ jactara, cuayar síw̃ titara istátaro. Baat aját cuayar chihtá siw̃ti chihtá ityat, asan ahní rehcatáro. <sup>7</sup>Aját ba cuitar Sir ojcor conro. Baatán ay bár yajti acu conro. Baat as tamo cuayar síhw̃ac tacat, cuayar síhw̃ati tacat, baat ur ay yajcayta acu conro. <sup>8</sup>Aját ay bi ruh̃w̃ ún acura icurí yájcajatro. Cuat ay bi yajquín acura aját cuít yajcátaro. Eyta bira baat ay yajcayta acu ba cuitar Sir ojcor conro. <sup>9</sup>Asan cuáyinan wan tacat, ba urán tahnác rehcatat, asan ahniro. Eyta bira ba cuitar Sir ojcor conro, ba urá cuít chácayta acu. <sup>10</sup>Asan cajc istiy cuar ba acu carit uch cuihsúr ayro. Aját baan cuít tecuay cuti acu récaji cuihsúr ayro. Sir imát as caquir uw ayin acu yehnún wajacro. Ima chihtá uw quin wácati yajc ayin acu wajacro. Cuat uw ruh̃w̃ ún acuí as cátiro. Eyta bira ey chihtá cuitar tecuay cuti acu récaji cuihsúr ayro.

<sup>11</sup>Rábinu, etac cuihsuro. Ba tamo séhw̃aro. Urá ay bár ey tehmowi. As ajca rahcwi. Rahra, rahra urá istanác chaw̃i. Rahra, rahra técuati ítuwi. Eyta yajcayat, eyta ityat, Siran ba owár ítayqueyra. Siran uw racar rehquít uw quin ohbac it ayro. <sup>12</sup>Rahran, rahran ahní ténawi. <sup>13</sup>Sir chiwa bahnáquinat ba tamo sihw̃ac wac ayro. <sup>14</sup>Aját ba cuitar conro. Cara Jesucrístoat ba racar rehquít obir yajcayta acu, Síratan ba sehnác chácayta acu, Ajcan Cámuran Ey ba owár ítayta acu conro.